

Las expensas per la sanadad s'augmentan vinavant

■ (anr/ld) **Las expensas per la sanadad s'augmentan er ils proxims onns pli svelts che l'economia. Quai ha constatà l'Institut da perscrutaziun da la conjuntura (IPC) a Turitg. Prest muntan las expensas per la sanadad a quasi 80 milliardas francs l'onn.** Tenor las prognosas da l'Institut da perscrutaziun da la conjuntura (IPC) s'augmentan las expensas totalas per la sanadad en Svizra l'onn 2015 per 2,8% e l'onn 2016 per 3,2%. Il sector da la sanadad s'extenda vinavant sin 11,9% dal product naziunal brut (PNB) l'onn 2016. Suenten in augment massiv dals custs l'onn 2012 da 5,3% quintan ils experts da Turitg cun in augment moderà ils proxims onns. Ils

motivs èn ina creschientscha economica main optimistica, il stop per medis specialists e la reducziun dals pretschs per medicaments da 720 milliuns francs, decretada da cusseglier federal *Alain Berset*. Tenor ils experts èn er ils custs dals ospitals s'augmentads be moderat en connex cun l'introducziun da las pauschalas per cas. Muntavan las expensas totalas per la sanadad l'onn 2012 a 67,9 milliardas francs, quintan ils prognostichers fin l'onn 2016 cun in augment da las expensas sin 77,3 milliardas francs. Dapi l'introducziun da l'obligatori d'assicuranza per mintgin l'onn 1996 èn s'augmentads ils custs per la sanadad in tras l'auter per 3,9%. In augment massiv da las expensas

pon ins constatar tar las prestaziuns da spitex (+6,6%).

Gronda muntada economica

Il sector da la sanadad è da gronda muntada per l'economia. L'augment da la populaziun svizra, il fatg che la gliued vegn pli e pli veglia e las novas pussaivladads che porscha la medischina da perferenziun pretendan novs posts da lavur. Qua sa tracti da posts da lavur d'auta qualid e cun ina considerabla creaziun da valor. L'onn 2014 metteva a disposiziun il sector da la sanadad 239 800 posts cumplains da lavur, quai che munta in augment da 4,9% l'onn 1992 sin 6,8% l'onn 2014 en cumparaziun cun il total da plazzas da lavur.